

REGLUGERÐ

um starfssvið og starfshætti lyfjaskrárnefndar.

1. gr.

Formaður boðar til fundar, er hann telur þess þörf, eða þegar minnst þrír nefndarmenn óska þess. Fundarboðun skal vera með þeim fyrirvara, sem nefndarmenn koma sér saman um hverju sinni. Sérfróðum starfsmönnum nefndarinnar skal heimilt að sitja fundi. Hafa þeir tillögurétt, en ekki atkvæðisrétt.

2. gr.

Nú getur nefndarmaður ekki sótt boðaðan fund, og ber honum þá, er formaður óskar þess, að kveðja til varamann sinn, er tekur sæti á fundinum með fullum ákvörðunarrétti. Fundur er ályktunarfær, ef viðstaddir eru, auk formanns (eða varaformanns), minnst fjórir nefndarmenn, þar af a. m. k. þrír aðalmenn. Formaður stjórnar fundi.

3. gr.

Nefndin heldur gerðabók, þar sem fundargerðir og samþykktir eru bókfærðar af fundarritara, skipuðum af formanni. Fundargerðir skulu undirritaðar af þeim, er á fundi voru.

4. gr.

Afl atkvæða ræður afgreiðslu mála í nefndinni. Verði jöfn atkvæði, ræður atkvæði formanns úrslitum.

5. gr.

Formaður annast fyrirgreiðslu vegna skrifstofuhalds og starfsliðs nefndarinnar.

6. gr.

Verkefni lyfjaskrárnefndar eru:

- 1) Að gera tillögur um lyfjaskrá, lyfseðlasöfn og lyfjaforskriftir, sbr. 2. gr. lyfsölulaga.
- 2) Að láta í té umsögn um það, hvort þeir, sem hafa lokið lyfjafræðiprófi, eða aðstoðarlyfjafræðingsprófi, fullnægi skilyrðum 14. gr. lyfsölulaga um að mega kalla sig lyfjafræðinga eða skilyrðum 15. gr. lyfsölulaga um að mega kalla sig aðstoðarlyfjafræðinga og starfa sem slíkir hér á landi.
- 3) Að gera tillögur um reglugerð, er segi fyrir um hverjar lyfjavörur, hjúkrunar- og sjúkragögn lyfjabúðir einar og læknar (dýralæknar), sem hafa rétt eða leyfi til lyfjasölu, megi hafa á boðstólum, selja eða afhenda, sbr. 40. gr. lyfsölulaga.
- 4) Að gera tillögur um skráningu sérlyfja og hvort endurnýja skuli skráningu sérlyfs. Þá gerir nefndin tillögu um nafn sérlyfs, ef ástæða þykir til, sbr. 53. gr. lyfsölulaga, sjá einnig 55., 58., 59., 62. og 63. gr. lyfsölulaga.
- 5) Að sinna öðrum verkefnum, sem augljóslega falla undir starfssvið nefndarinnar.

7. gr.

Nefndarmenn skulu vera til aðstoðar við samningu tillagna að reglugerðum samkvæmt lyfsöslulögum, eftir því sem ráðherra eða landlæknir, í samráði við formann nefndarinnar kveðja þá til hverju sinni.

Reglugerð þessi, sem sett er samkvæmt 2. gr. lyfsöslulaga, nr. 30 29. apríl 1963, öðlast þegar gildi.

Dóms- og kirkjumálaráðuneytið, 19. nóvember 1964.

Jóhann Hafstein.

Baldur Möller.

AUGLÝSING

**um breyting á samþykkt Sjúkrasamlags Grýtubakkahrepps, nr. 156
í auglýsingu nr. 172 24. október 1957.**

11. grein 6. töluliðar, A. liður: Samlagið greiðir nudd- og rafmagnslækningar, sem framkvæmdar eru samkvæmt fyrirsögn læknis, að ½, þó ekki yfir kr. 600.00 á hverju almanaksári fyrir hvern sjúkling.

Framangreind breyting á ofangreindri samþykkt staðfestist hér með samkvæmt lögum nr. 40 30. apríl 1963, um almannatryggingar, til þess að öðlast gildi þegar í stað og birtist til eftirbreytni öllum, sem hlut eiga að máli.

Félagsmálaráðuneytið, 20. nóvember 1964.

F. h. r.

Hjálmar Vilhjálmsson.

Gunnlaugur Þórðarson.

AUGLÝSING

**um breyting á samþykkt Sjúkrasamlags Vestmannaeyja, nr. 7
í auglýsingu nr. 49 29. marz 1957.**

11. grein 6. liður b. í samþykktum samlagsins orðist svo: Samlagsstjórn er heimilt, ef sérstaklega stendur á og trúnaðarlæknir telur nauðsynlegt, að greiða ferðakostnað samlagsmanna, vegna slysa eða bráðra sjúkdóma að ¾ hlutum og Tryggingastofnunin tekst á hendur að greiða hluta kostnaðarins, sbr. 78. grein almannatryggingalaganna.

Framangreind breyting á ofangreindri samþykkt staðfestist hér með samkvæmt lögum nr. 40 30. apríl 1963, um almannatryggingar, til þess að öðlast gildi þegar í stað og birtist til eftirbreytni öllum, sem hlut eiga að máli.

Félagsmálaráðuneytið, 20. nóvember 1964.

F. h. r.

Hjálmar Vilhjálmsson.

Gunnlaugur Þórðarson.